



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 7

Jannik Sinner-i Grigor Dimitrov koka Miami Open benogo

Ken o ka nung court-i Imran Khan nem khen atema taitok agütsüogo



VOL. XXI ISSUE NO. 169 (ADOK 169) DIMAPUR SANGTENNÜ (TUESDAY) RONGCHII (APRIL) 02, 2024 ₹ 5.00

DAYO aser WSH-i Baharudin aitsür

Dimapur, April 1, 2024 (TYO): Dimapur Ao Youth Organisation (DAYO) aser Western Sumi Hoho (WSH)-i sangdong balala ajanga Baharudin aitsüba metetdaksüogo.

Dimapur Commissioner of Police aser pa den yariteperemi Baharudin ta ser North-east drug kingpin den teyariteperem apuba asoshi tenüngsang agütsür ta Dimapur Ao Youth Organisation (DAYO)-i ashi.

DGP Nagaland Rupin Sharma lenisüba kübok Nagaland Police-i Nagaland nungi drugs khuret agientsü merangba atema tenüngsang agütsür ta DAYO-isa ashi.

New Market Jame Masjid Committee nung president aser Nagaland nung tongtipang shishilemar ka apuba atema süngmanger aser iba nisung ya tatemtsü kecha melii mapa nungi anentsütsüla, ta DAYO-isa ashi.

Küm aika Naga loktiliba nung drugs khuret ajanga timtema arur aser drugs shibelener tetsüdi apuba ajanga police aser administration-i Baharudin inyakba masjid committee aser pa sendaka aliba telok ajak jangjatsüla ta DAYO-isa metetdaksüogo.

"Lokti tetet ka ama DAYO-i Dimapur aser Nagaland nung

nisung ajak putepa alitsü asoshi inyaka arur. Ajisüaka drugs ajanga lanurtem aser kaketshirtem taküm samatsüba atema onoki ola adoktsü aser Naga lanur telok ajak dang war on drugs asoshi longjemtsü ayongzüker" ta Media Cell, DAYO sangdong ka nung ashi.

DAYO-isa bangdakpur dang aibelener ajak nem tapet temerenshi agütsütsü mepishia metetdaksüogo.

WSH-ia tanga sangdong ka ajanga Bahar Uddin aitsüba metetdaksüogo.

New Market Jame Masjid Committee president ka ama tashi amshia pai ozüng alema drug shibelenba mapa inyakba atema temulungraksar. Pai inyakba mapa ajanga lanur taküm aika raksatsüogo ta Media Cell, WSH-i ashi.

Bahar Uddin-i inyakba maparen jungjunga bushisüngdang asütsüla aser ozüng tapet agi merenshitsuila. Tai maketerem iba ama nisungtem nungi jembua lidaktsütsü atema temeten agütsütsüla ta parnokisa ashi.

WSH-isa Director General of Police, Nagaland Rupin Sharma IPS aser Commissioner of Police Dimapur Kevithuto Sophie, IPS na nem tenüngsang agütsüba metetdaksüogo.

ENPO-i Lok Sabha elections nung shilem magitsü nenshir



Eastern Nagaland Peoples' Organization (ENPO)-i lungkak aitba sentong ka agidang tangokba noksa angur. (File)

Dimapur, April 1, 2024 (TYO): April 19, 2024 nü Nagaland nung Lok Sabha elections nung Eastern Nagaland Peoples' Organization (ENPO)-i shilem magitsü lemtetogo.

ENPO-i State Chief Electoral Officer, Nagaland ajanga Election Commissioner of India dangi shidi ka nung parnoki Lok Sabha elections nung shilem magitsü lemtetba agizütsü mepishio.

Election Commissioner-i iba onük agizükba atema pelar aser nungdakra osang tejangja mesüra jangjashiba onüktem metetdaksütsü nangzüker ta ENPO-i ashi.

Ministry of Home Affairs (MHA)-i December 7, 2023 nü Frontier Nagaland Territory tentetsü nangzükaka Centre-i iba mapa meinyakba atema tejashi sayua ENPO Lok Sabha elections nung shilem magitsü lemtet.

March 19, 2024 nü ENPO-i 'Chenmoho Resolution' akangshiogo aser iba nung ken o metembang tashi Central aser State elections nung shilem magitsü lateta lir. Onoki MHA dang aiben nenshiogo saka parnok nungi telangzüba kecha maliba ajanga onoki taruba Lok Sabha elections nung shilem magitsü ta ENPO-isa

metetdaksü.

MHA dang aiben shiaka parnoki onok ola mangashii dang yutsü aser tatem nung ECI-i Model Code of Conduct (MCC) tenzükba osang ang metetdaksü. Anungji Eastern Nagaland nung alirtem mepelaba sayua iba lemtet ya agiogo, ta ENPO-i shidi nung shia lir.

Onoki election maparen anema menoktaker saka onok mepelaba sayutsü atema iba mapa inyaker. Anungji onoki Lok Sabha elections of 2024 nung shilem magiba ya Election Commissioner of India-i agizütsü mepishir, ta ENPO-isa ashi.

Tir Yimym-i tsürabur T. Sakunungla Ayoklar mang ayimer



Asür T. Sakunungla Ayoklar

Tsürabur asür Sakunungla den asüpila sentep sentong asüng (April 2) anepdang 11:00 ako nung Longchara nung agitsü.

Asür T. Sakunungla Ayoklar ya January 30, 1935 nung aso aser arishir ka ama lia arur April 1, 2024 nü tango sademogo.

Tir Yimym nung inyaker ajaki Yimozülur K Temjen Jamir aser par kinunger den tako marok lemsateper aser tsürabur tanela teti atema anisüngzük ngudakjang ta sarasademer.

La asüba osang angashiba sülen kija aser telok balalai asükhu aser mangyim tejashi lemsatepba osang metetdakja arur. Dimapur Press Club aser Nagaland Page-ia sangdong balala ajanga asükhu lemsatepba metetdaksüogo.

Dimapur, April 1, 2024 (TYO): Hombar nikongdang Tir Yimym Yimozülur K Temjen Jamir tetsü T. Sakunungla Ayoklar alima nungi pilar Kibuba dangi ogo. La arishi küm 90 liasü.

China-i Arunachal nung tesem 30 tenüng melener

Itanagar, April 1, 2024 (Agencies): China-i Arunachal Pradesh ya par meyong ta ashir aser parnoki Arunachal dang 'Zangnan' ta ajar.

Tanü China-i 'Zangnan' nung nungja 30 melenshiba osang metetdaksü.

Ministry of Civil Affairs-i Arunachal Pradesh nung tesem 30 atema "standardized geographical names" list pezübbuba sayaogo, ta Chinese state media-i ashi.

China-i April 2023 nung list tasembuba sayadang Chinese characters, Tibetan aser pinyin

amshia Arunachal Pradesh nung tenüng 11 melena liasü.

China-i 2017 nung list mezüngbuba metetdaksü aser 2021 nung tanabuba sayaa liasü.

Prime Minister Narendra Modi-i Sela Tunnel lapoktsütsü atema Arunachal Pradesh semdangba China-i aitsüba sülen iba mapa inyakogo.

"Arunachal Pradesh ya India meyong ta onoki jangjajangja shiogo aser iba ya aiben nenshia arur. China-i kuli kecha melii noktakba ajanga ozü jenjang meraksatsü" ta Ministry of External Affairs (MEA)

spokesperson Randhir Jaiswal-i ashi.

"Arunachal Pradesh ya tesüba nunga, tang-a aser tarutsü nunga India state ka asütsü" ta Hombarnü External Affairs Minister S Jaishankar-ia ashi.

"Tanü ni nür ki tenüng melenshi nung ozü ki akümtsü asü koda" ta Jaishankar-i osangbener dang ashi.

Tenüng melenshiba ajanga Arunachal Pradesh litsü nung mekongshir. Talisa Arunachal (Line of Actual Control) nung Indian Army mapa lemezükja lir, ta paisa ashi.

Centre sorkari Nagaland nungi AFSPA agientsüla: NSF

Dimapur, April 1, 2024 (TYO): Centre sorkari Naga lima nung Armed Forces Special Powers Act (AFSPA) atsülangba aitsür ta Naga Students' Federation (NSF)-i metetdaksüogo.

Centre sorkari Nagaland kübok district 8 aser district 5 nung police stations 21 kübok aliba tesemtem 'disturbed' ta ita trok atsülangogo. Iba ya September 30, 2024 tashi alitsü.

Centre-i Naga nunger temeten aser taginüba mezüngoki iba

lemtet agiogo. Parnoki AFSPA nung ajemdaker meimchir temeten anema inyaksangshir, nisungtem tepseter aser tashiyim benshir, ta NSF-i ashi.

India sorkari Nagaland nung AFSPA benoka aliba agientsüla aser Naga nung khuret aser taginübatem atema nendaka olemteptsüla ta parnokisa ashi.

Naga nungeri AFSPA anema raraba nung international community, human rights

organizations aser mulungsentsü shitak aliba nisung ajaki yariteptsü ayongzüker, ta NSF-isa ashi.

"Onok ola mangashi tashi, ozü temeten akhümtsübu masü tashi aser ozü lima nungi mitkartem tashi magien tashi onok animesüngzüktsü. Onoki Naga nunger temeten aser taginübatem kümzüka ayutsü aser temeten mangu tashi onoki mapa inyaktsü" ta NSF-isa metetdaksü.

DIMAPUR AO BAPTIST AROGO HEALING MINISTRY TANEPTSÜ SENTONG

DABA main church Duncan nung April 3, 2024 anepdang 7:00 am nungi sentong tenzüktsü. Tamang agi arung, ali mozü agi manepetba Tashidak Tsüngremibo aneptsütet. Tsüngrem asoshi kecha tamakoktsü malia. Yisui la dang ashi "Tenü nü tamang agi na junga kümogo... Junga liang." Mark 5:34.

Sd/-
Pastor, DABA.

Raj Bhavan Kohima nung Odisha state Foundation Day amung



Dimapur, Rongchii/April 01 (TYO): Raj Bhavan Kohima nung April 1, 2024 nü Odisha State Foundation Day munga liasü.

Iba sentong nung Nagaland Angh La Ganesan-i jembidang, 'Unity in diversity' kübok iba benjongmung ya Odisha indang state foundation day kisung masü saka 'Ek Bharat Shrestha Bharat' indang tanüla benjongba lir, ta ashi.

Ibai tongtipang anogomung ka lir, kong asenok arütsü balala nung liaka ka kuma lungjemdaksür, ta ashi.

Iba anogo ya Guru Tegh Bahadur asoba anogo ka asünung ajak dangi salem abener aser Guru Tegh Bahadur ya tasü tait temaitsü ka ama ajaki teti akumtsübotsü, ta pai ashi.

Tamangba yimsü temenden kumzüka ayutsü mechi pai takum bendanga agütsüba ya puti otsü nung medemdangtsü makok, ta ashi.

Odisha indang Angh-i rateta ashidang, tesüiba mapang nungi iba state kanga merena aru,

kong sobaliba tajung lir aser India tejen otsü nunga tongtipang tesem ka liasü, ta ashi.

Konark nung aliba Sun Temple nungi Chilika Lake tashi, Puri nung temeshi Jagannath Temple nungi Ikat weaves tashi, Odisha nung medemdangtsü makokba diversity lir.

Asenoki iba anogo amungdang, Odisha nübur dak tanüla tajung aliba, parnoki timtem balala nung tasü ita nokdakba aser art, culture nung parnoki shilem tajung agiba aser asen linük nüjiso asoshi nokdakba asenoki bilemtetsüla, ta Angh La Ganesan-i ayongzük.

Odisha aser Nagaland ya alinük meta talang agi pilar liaka "Ek Bharat Shrestha Bharat" amala sentong ajanga state balala nungi nüburtem tsüngta tesendaktep tajungba adokdaksür, ta ashi.

Pai Odisha nungi arua Nagaland nung alirtem dang sobaliba tajung wazüka ayutsü

aser kati ka akumtsübotepa telungjem tali adokdaksütsü ayongzüka liasü.

Iba sentong tenzüka Mhomo Tungoe, NCS, Joint Secretary to Governor ajanga iba sentong ayongzükba nükjidong rateta ashi aser Dr. Rajesh Tati, Secretary, Hindu Seva Samiti, Dimapur & Advisor, Oriya Samaj, Kohima ajanga Odisha state indang onük nung jembia liasü.

Iba sentong nung Kabiray Altia, President, Oriya Samaj, Kohima; Prabhakar, Advisor, Oriya Samaj, Kohima aser R. C. Panda, Oriya Samaj, Kohima nung temia o tatsütsü jembia liasü aser Jochule, Section Officer, Governor's Secretariat ajanga melepzung o jembi.

Iba sentong nung Odisha state nungi Biswarupa Dixit aser Aniket Pallav Nayak nungeri Hidimbi Abhinaya aser Bakulavaranam Pallabi agi shilem agi aser Binita Gurung ajanga sobaliba tsüngsang ka agi shilem agia liasü.

Phesama yimdak self-employment training agütsü

Dimapur, Rongchii/April 01 (TYO): Lanurtem tsüngta self-employment jenjang tajungba nung ajungketsü atema March 30, 2024 nü Merama Khel, Phesama yimdak One Day Skill Training agüja liasü.

Iba sentong ya RD Block Jakhama kübok Kevi, Village Level Organisation (VLO) Phesama Village ajanga ayongzüka liasü aser school züngtur anener atema Social Development inyakym nung shilem ka ama Day-&1 NSRLM ajanga promote süja liasü.

Iba sentong nung jembidang, küm shia school züngtur anenba aser mapa mongui aliba lanurtem timba akumer aser iba yongji lanur aika mashi lenmang nung jajar ta Area Coordinator Sokhrienuo Rüp-re-o ajanga ashi.

Lai lanurtem dang, talisa zünger mapa mangu alirtem dang dangar dak memetaloki ochishia aser pei sasa pei poksünga alitsü ajungshia liasü.

Iba training mapang traditional weaving, tailoring, basket making, pickle & biscuits

making, hair cutting, sketching amala sayua liasü.

Iba training nung shisalen sayur ya VLO kübok Self Help Group (SHG) züngsemtem aser yimtsüng nungi weaver, artist, barbers, tailor tem densema self-employed youths tem liasü.

Village Level Organization, Phesama yagi tesüiba küm ana tashi lanurtem atema skills training agüja arur aser tarutsü anogotem nunga maneni ayongzüksü sentong lir.

Iba training nung lanur 20 arua shilem agia liasü.



18th Lok Sabha Election 2024 nung poll duty atema shimba duty personnel tem medical ground nung leave agütsür alirtem April 1, 2024 nü ADC Planning, Mokokchung indang Conference Hall nung Medical Board ajanga temang tendangba noksa nung angur.

DPC ajanga asükhü lemsateper

Dimapur, Rongchii/April 01 (TYO): Tir Yimyim osangkaket Yim O zülur K Temjen Jamir tetsür T Sakunungla Ayoklar asüba osang angazüka temulung zürepa jashir, ta Dimapur Press Club (DPC) ajanga sangdong ka nung ashi.

Sakunungla ya tanü Akhoya yimdak asü. DCP ajanga K

Temjen Jamir aser par mangyimer kibong den asükhü lemsateper.

Tarutsü anogotem nung nenok temulung nung anisüngzük aser taneptsüba angutsü onoki sarasademtsür. Teti meima aliba asür ojala tanüla tesunep nung anisüngzükjangma, ta DCP sangdong ajangasa ashi.

School Education Department ajanga AA, PIO aser APIO shim

Dimapur, Rongchii/April 01 (TYO): Right to Information Act, 2005 indang Section 5 & 9 nung mela aliba ama Nagaland Angh-i School Education Department atema Appellate Authority (AA), Public Information Officer (PIO) aser Assistant Public Information Officer (APIO) shimogo.

Administrative level nung Kevileno Angami, Commissioner & Secretary ya Appellate Authority (AA) asütsü aser email cseducation22@gmail.com alitsü; T. Yanpvuthung Kikon, Additional Secretary ya Public Information Officer (PIO) asütsü aser email tykikon0@gmail.com alitsü aser

Imokokla, Deputy Secretary ya Assistant Public Information Officer (APIO) asütsü aser la indang email imokokla.tia@gmail.com alitsü.

Directorate level nung Thavaseelan K, Principal Director ya Appellate Authority (AA) asütsü aser pa indang email thaval862@gmail.com alitsü.

Razouseyi Vese, Additional Director ya Public Information Officer (PIO) asütsü aser pa indang email razouseyivese@gmail.com alitsü aser B. Nellayappan, Deputy Director ya Assistant Public Information Officer (APIO) asütsü aser pa indang email bnellayappan@gmail.com alitsü.

AR-temi Yezashi yimdak medical camp ayongzük



Dimapur, Rongchii/April 01 (TYO): Nüburtem tenzüka nung bendanga agütsür inyakba nung shilem ka ama Assam Rifles temi Zunheboto district kübok Yezashi yimdak March 30, 2024 nü medical camp ka ayongzüka liasü.

Meta talang nung alirtem medical facilities bushiba mapang timtem ajuruba ajiteta Assam Rifles temi iba sentong ya ayongzüka liasü.

Medical tsütsü takotet nisung

telok ka den teyariteper temi iba camp nung general check-ups, consultations, screenings aser mozü lema agüja liasü.

Iba sentong nung nisung 324 arua temang reprangdakja aser mozü agia liasü. Aika meta talang nungi teyari agitsü atema arua liasü.

Iba camp tatemi Assam Rifles temi nüburtem dang tarutsü anogotem nunga iba ama sentong ayongzüksü tebilemba lir ta ashi.

Mejangjaba nisung tasü mang ka District Hospital Dimapur nung lir

Dimapur, Rongchii/April 01 (TYO): West Police Station, Dimapur nungi police temi JB Diesel Shop, Dimapur anasa mejangjaba nisung ka süchia orr aliba March 29, 2024 nikongdang 3:00 ako meta oa kumzüka anir oa District Hospital Dimapur nung temang anepalua yutsüba süogo, ta March 31, 2024 anüngdang 11:31 ako meta District Hospital Dimapur ketdangsurtemi Dimapur Police nem osang agütsü.

Iba sülen duty nung alirtem District Hospital Dimapur bushia ao aser mejangjaba

nisung (non-local) arishi küm 45-50 shi tain tebur ka sür aliba angu. Iba nisungba ya T-Shirt sentsü tanet, Khaki long pant agir tabis tanak ka teperem nung mesüluka liasü. Iba nisungba ya tar süklen pongu sür inch pezü shi talang lir. Iba tasü mang ya jangjatetsü atema morgue nung yua lir.

Iba nisungba dak tim masüba mapa inyakba kecha mongutet. Kibur/kinunger/tembar temi Officer-in-Charge, West PS Dimapur den mobile number 7085055024 ajanga tongtepretsü akok, ta Dimapur Police sangdong ka ajanga ashi.

Delhi CM Arvind Kejriwal Tihar Jail No 2 nung puokogo



April 01, 2024 nü New Delhi nung aliba court ka nungi police van ka nung Delhi Chief Minister, Arvind Kejriwal, Tihar jail-i anir aodang tangokba noksa nung angur.

New Delhi, April 01 (Agencies): Delhi court kati April 15 tashi Delhi Chief Minister Arvind Kejriwal judicial ket nung ayutsü melaba sülen Amongnü pa Tihar Jail Number 2 nung puokogo.

Anogo ishika tejaklen kasa Jail nung puoka alisang Aam Aadmi Party (AAP) MP, Sanjay Singh Jail number 5-i belena liasü.

Jail number 2 nungji Arvind Kejriwal kija asütsü. Delhi excise policy ken o dak sendakba nung March 21 nü ED-i Kejriwal apuba sülen tang tashi pa dang asüngdangyadar.

Tihar Jail nung taoba mapang Deputy Chief Minister aser AAP lenir, Manish Sisodia Jail No. 1 nung puoka lir, taoba mapang Health Minister aser

AAP lenir Satyendar Jain Jail No. 7 aser Rajya Sabha MP Sanjay Singh Jail No. 5 nung lir.

Bharat Rashtra Samithi lenir aser taoba mapang Telangana Chief Minister, K Chandrashekar Rao'er jala, K Kavitha-a Jail No. 6 nung puoka lir.

Kejriwal puokba Jail Number 2 nungji khen-a methitemi CCTV surveillance alitsü. Pa puoka aliba takdang nung yipten ka, tziü tajemtsü aser cooler ka lir.

Tihar Jail-isa Kejriwal densema diabetes agi shiranger ajak nem medical teyari agütsütsü.

Kejriwal nem broadcasting news, entertainment aser saisapong tv channels

agütsütsü.

Kejriwal-i Ramayana, Mahabharata, Geeta aser 'How Prime Minister Decides' densema kaket ishika pa nem agüjang, ta mepishiogo.

Tihar Jail nung anogo shia pa 6:30 ako meta saakba sülen süngo den bread achitsü, iba sülen court matsüngdangi aotsü mesüra pa indang legal advisors ajurutsü. Anepdang 10:30 ako meta chi den aonsotsü, roti pongu aser dal angutsü. Nikongdang 3:30 ako meta süngo den biscuit angutsü. Nikongdang 4:00 ako meta pa semdangertem aser lawyers ajurutsü melatsü aser 5:30 ako meta meta chi, aonsotsü, roti aser dak angutsü.

Aonung 6-7 meta pa takdangi meyipa aotsü.

Tepela Tasoba Anogo



K. Tongpang Ao
92nd Birthday, 2nd April, 2024

Ozü tebuti

K. Tongpangnoktang (Longkhum) tanü tasoba küm 92 abensar.

Tanü tashi anema yuja temoatsü nung anir arunung Tsüngrem tenüng asanger aser kinunger ajak pelateper. Pa ano arishi talang Tsüngremi moajangma ta ozü sarasadem.

Happy Birthday !

- Temeim kinungertem.

Sorkari metokmeperi metong-shitsü melunga dang lir: PM Modi

New Delhi, April 01 (Agencies): Ato kilonser, Narendra Modi-i, electoral bond data ken o ya BJP-i yimsüsüba linük atema tamakok ka masü aser iba sesheme anentsüba atema tang pelatepba opposition party temi tesülenbo temelung meyiptsü, ta ashi.

Electoral bond scheme dak sendakba nung Modi-isa, inyakyim kecha tabensaba mali aser sorkari metokmeperitem metongshitsü melunga dang lir, ta metetdaksü.

Tawa interview ka nung, electoral bond ken o ya ner

sorkar atema tamakok ka asü?, ta asüngdangba langzüdang Modi-i, "Tamakok ka, ta ni bilemetsüsa onoki kechi inyak? Iba onük nung tang tsüngsangteperitem aser mezümekümertemi tarutsü nungbo temelung meyiptsü," ta ashi.

Ato kilonserisa, iba data ajanga senotsü tenla agütsürtem aser tagizükertem maitsü jangjatsüogo, koba ajanga inyakyim teladak kümdaktsür; 2014 küm matongdangbo inyakyim teladak maliasü, ta ashi.

Supreme Court tetuyuba

kübok SBI aser Election Commission-i electoral bond dak sendakba osang ajak sangdongba sülen opposition party temi iba data nung ajemdaker sorkar aitsür.

February ita nung Supreme Court-i electoral bonds scheme ya anenja liasü.

Supreme Court obendang nung ajemdaker State Bank of India (SBI)-i electoral bonds osang ajak Election Commission nem agütsü aser election commission-i parnok indang website ajanga item osang ajak yimjak nung sangdong.

Hybrid garitem nung GST ajema agitsü tebilemba lir: Nitin Gadkari

New Delhi, April 01 (Agencies): India nung petrol aser diesel gari crore 36 dak tema ajemtsütsü nükjidong nung Road Transport & Highways Union Minister, Nitin Gadkari-i hybrid garitem nung GST saru ajema agitsü tebilemba nung inyakdar.

India-i petrol aser diesel gari ajak nokdangtsü akok asü?, ta interview ka nung asüngdangba langzüdang Union Minister Gadkari-i, "Ibaji takoktsü. Kanga tasak asütsü saka tamakoktsübo masü. Ibaji kü nükjidong lir," ta metetdaksü.

Gadkari-i, tang India-i küm shia bendanglen nungi totzü alizükba nung sen 16 lakh crore indoker, anungji linük nung petrol aser diesel gari nokdangra totzü alizükba nung indokba senji kümzüka aluyimertem aser yimtsüngtem tajangzük ngudaktsüba den külemi lanurtem atema mapa maongka agütsütetsü, ta ashi.

Union Minister-isa, 2004 küm nungi tenzüka pai petrol aser diesel masü saka tanga totzü amshitsü atema jembia arur; taruba küm 5 nungi 7 tsüngda nungbo temelenshi alitsü ta pai amanger, ta metetdaksü.

"Temelenshi atemaji ni

anogo aser küm meshitetsü, kechiyong ibaji kanga tasak. Ibaji kanga tasak saka tamakoktsübo masü," ta pai ashi.

Gadkari-isa, Bajaj, TVS aser Hero ama auto company temi flex engines amshia motorcycles yanglutsü tebilemba lir aser kasa technology ji amshia auto rickshaws yanglushitsü tebilemba lir, ta metetdaksü.

"Hydrogen ajanga arongba gari ka nung ni senzür. Nenoki kibongtem nung electric gari amshiba angutsü. Nisungtemi ibaji tamakoktsü ta jembia liasü saka tangbo item gariji amshir. Tesüiba küm 20 tashi ni jembia aruba atalokdang nüburtemi tangbo amangtsü tenzüker," ta pai ashi.

"Tata aser Ashok Leyland-i hydrogen ajanga arongba trucks yanglu tenzüko. Tangbo LNG/CNG arongba truck amshir. Tang linük tesem balala nung bio-CNG indang factory 350 dak tema lir," ta Union minister-isa metetdaksü.

"Temelenshi tulu adokdar. Bendanglen nungi totzü alizükba anentsü aser iba linük ya tangar dak memetalokba linük 'Atmanirbhar Bharat' akümtsü," ta paisa shisem.



April 01, 2024 nü Himachal Pradesh kübok Mandi jila nung actress aser BJP candidate, Kangana Ranaut-i Lok Sabha election atema nüboyimdang lai süngo anganüa agütsüdang tangokba noksa nung angur. Taruba Lok Sabha election nung lai Mandi constituency nungi tokteptsü.



TIR YIMYIM YIMOBILEM (EDITORIAL)

DIMAPUR SANGTENNÜ, APRIL (RONGCHII) 02, 2024

Baharudin anema ola adoker mali

- P Tiamongba Aier

Nagaland police-i Assam police den yaritepa March 22, 2024 nü North East nung drugs shibelener tetsüdi ka apu. Nagaland police-i ita aika bushia aruba sülen Assam kübok Sonitpur nung drugs shibelener Baharudin apu aser pa den yariteper nisung ana Dimapur aser Imphal nunga apu. Baharudin dang "Druglord of the Northeast" ta ajar aser Northeast kübok tesem balala nung pa anema ken o tem benoka lir. Pai state aika nung drug network ka ketdangüa aru aser sunflower, ganja aser tanga drugs alizükba, belenba aser ayokba nung shilem agia liasü. Baharudin-i küm aika ozüng amertem dang nungi jenshia aru aser pai tenüng, phone numbers aika amshi aser tesem balala nung jenoker drugs shibelenba maparen inyaka aru ta osang angazüker. Baharudin ya Dimapur nungi lir aser pa pua arutetba osang ya Northeast nung dang masü saka national media nunga prokshio go saka Naga nunger kija mesüra telok shingaia ola madoki dang aruya lia Global Window-i March 30, 2024 nü Dimapur kübok Zeliangrong village nung Nagaland police-i Baharudin'er ki mita aoba osang prokshiba sülen ang telok ka khen ka ta ola adoktsü tenzükogo. Global Window ya Dimapur nungi digital news platform ka lir aser parnoki mapang shia nübortem dangi osang balala bener arur aser investigative journalism ta ajaba mapa tajung inyaka arudar. Tangar shingaia ola madoki alidang Baharudin atema tebilemstü khuret bena tasütait ola adokba atema Global Window nem tenüngsang agütsütsü tim aser parnoki ayongzükba ama Naga nunger kija aser telok balalai Baharudin-i inyakba mapa ya khukhua aitsütsüla aser tarutsü nung Naga lima nungi ibala mapa tamajung meinyakdaksütsü atema tansütsüsa mapa kar inyaktsü nungdaker. Dimapur nung Naga Council Dimapur (NCD)-i anir loktitentet aika lir, külen Naga Political Group ajak adenshia lir aser ano Arogo aika lir saka parnoki mapang shitak nung Baharudin anema ola kecha madokbaji teratatsüka lir. Ozüng alema inyakba mapa tapu balala lir saka item rongnung tamajungtiba ta shitetsüpur nung drugs shibelenba ya ka asütsü, kechiyong iba ajanga nisungtem mozular (drugs addicts) kümdaktsür aser nisung ka taküm anojungi samatsür. Anungji iba ama mapa tamajung inyaker dangbo sen aika senchi achiba sülen taküm piyong tepuokdak ayutsü langa lir. Osang angazükba agi Baharudin yagi küm aika drugs shibelenba ayokba mapa inyaka aru aser iba tetezüji nisung taküm aika aser talisa lanur taküm aika raksatsüogo. Anungji pa ama drugs shibelener tetsüdi yabo ozüng tesashitiba agi merenshitsüla aser tasüba temerenshi magüjaka taküm piyong tepuokdak ayutsüla saka aitsür mesüra terongshir melira pa anogo ishika tsüngda bail nung chiokadoktsü ana nung dang lir. Anungji Dimapur nung alirtemi dang masü Nagaland tesem balala nung alir ajaki Baharudin-i inyakba mapa aitsütsüla aser ozüng amertem dang ozüng tesashitiba agi merenshitsü ola yoktsüla. Küm aika pai iba mapa inyaka arubaji pa kisüngi dangbo masütsü aser Naga nungera karibo yaritepera alitsü alitsü anungji police-i pa dang asüngdangya asü dang nangzükba nisungtemjia pua tapet temerenshi agütsütsüla. Nagaland Police-i "War on Drugs" yimiyim ayimoktsür kanga dang meranga inyaka arudagi anungji parnoki tali bendanga agütsüshir inyaktsü aser nükjidong tongteta inyaktsü atema Naga public-i parnok pusema nungitsüla. Sorkar mesüra tanga tashi kar ajanga Nagaland Police alenbanger sadema meinyaktetba mapang ajurura public den item khuret lemsateptsüla aser külemi teka amteper tim masüba tashi ajak kokteta "War on Drugs" ya akangakanga inyaktsüla aser Naga lima nung Baharudin ama drugs shibelenba ayokertem ka khen ka ta puyonga aotsüla.

OLEMSABANG

Kokrabangla item yabo melenshi nung koda...???

~ L. Kika Pongener.

1. Tsüngküm mapang (Winter season) ya benjong-bentsü aser Sadiba (Wedding) mongpo lir. Nisung ajak kanga mazüngi aliba mapang. Anogo nung Sadi ana-asepa repa ajurur, anungji mapang lemsar dang aor. Tenla kidang 'Külizüng' agir alua, chiyungdak 'Kiyimsang o Kiyimla' na metettepa aser meimtepa aruba otsü, shia mapang talangka meindoki...Tarur pela-a agizükerbo chiyungtsü meshiteta sarasademer, benjong chiyungji tenzüka aoba tajungba asütsü. Sadi kar nungpo sentong anir-i mapang talangka agir, anungji ibaji melenshi nung koda ???
2. Tekülem sentep nung tongtipang sentong (Special Program) kar tatishitsü agi...Tetsü-tem anogo (Mother's day) sentep nung 'Tetsütem' atema bendanga agüja sarasademtsü nisung ka mejeteta enoker sarasademer...Saka ano sentep tenzüka temoatsü meshia sarasademer-ia 'Tetsü-tem' atemaji sarasademra...O shilo aiben lephiba jagi karibo lakteter...Anungji tekülem sentep atema temoatsü meshia dang saradem nung koda...???
3. Revival mapang sentep tatem nung shiranger atema...Taneptsü meshia sarasademba ya sentep matem sur tenzüka moi...Sentep temer tounurtembo oadoker külen, shiranger atema mapang peria agia sarasademtsüla...Sentep matem sur agira, tounur karbo moi talangka lakteta atatsüsa akümer. Anungji kokrabang iba ya melenshinung koda...???
4. Tenla kidang sentep mapang tasen-jang, takü-jang, nanglong (Sweets) aser chewing-gum mejaka amenba yimya yabo kanga-sa majung. Tekülem sentep nung ya kanga asüngteta külemtsüla. Tenla kidang tekülem mapang tapu-tapu mejakdena amenba yimya ya kanga-sa majung. Anungji iba yimya yabo melenshitsüla.
5. Akokba tashi tekülem sentep nung suoshia tekülem yimya nung subotsüla. Tangar tenuk jalotsüsa mesura azüapongtsüsa shi ateta anguba (Transperant) aser suoshi kanga tatsü (Short) suboba yabo kanga majung...Anungji tangar temulong yirutsüsa aser metsüdaktsüsa suoshi mesobutsüla. Ano Pulpit nung shilem agirtem aser wajak nung amenertem-ia suoshi tangar memettsüdaktsüsa tekülem yimya nung subotsüla.
6. Tekülem sentep ya mapang tatsütiba, oda talangba agia ghonda ka tashi nungpo atemtsüsa sentong yanglur ajaki sentong tarensen renemtsüla. Jubilee sentep amala dak alaka, tanga sentong nungpo, sentong tarensen kanga aika mesui tatsütiba nung renemtsüla. Tekülem sentep langra-ra agira, tantsür-tambur balaka teberem agi talangka amentsü makoker aser metsü-meshitsü mapang agi matatet kanga tim-atemer.
7. Tekülem sentep nung Skit, Drama, Choreography, jiloshi, tsüngsang ken etc. shilem agirtemi Khristan yimya (Christian Spirit) nung dang ayitsüla. Hindi Cinema ken, Rock ken, aser sungyanglu külemer tsüngsangba yimya nung maitsüla. Ano benjong-bentsü mapang wawa-menu (Damasha) yabo tenla kidangbo maitsüla.
8. Tekülem sentep nung sarasadem dang karibo...Onoki iba 'Suki' (Tent) nung na külemer ta sarasademer. Mosa nunger mapang 'Suki' nung külem...Saka tanübo asenok RCC & Building ki nung külemer. Anungji iba 'Tenlaki' nung na külemdang ta sarasademba tajungba aser shitakba asütsü. Anungji onoki iba tenla kidang na külemer...ta melenshia sarasadem nung tajungba asütsü ta bilemer.
9. Ano tekülem sentep nung sarasademer aikati..."Ozü sannuker-i ne o jembitsü renema lir" ta sarasademer. Asenok ya Tsüngrem'er santem, aser item san anuktsü atema 'Sannuker'-ji ayuba. Anungji kodang 'Ozü sannuker'...ta sudir...Asen meyong san anuktsü atema sannukerji ayu ama angateter. Anungji asenoki Tsüngrem dang par san anuksang indang ashir asünung...'Ne Sannuker'...ta ashiba-ang tapetba aser shitakba asütsü.
10. Sentep nung kari shilem junga agira, o junga jembira temoatsü nguogo ta kari salemer...Saka salemdang arogo lennir/tenzükker kar tenung tetshia, pa/la dang tajungba agiogo, mesura jembio go ta sangra, idangji lennir/tenzükkerji nemja-lutsür. Kar tenung asangdang karbo ludaktsür. Iba ama jembiba jagi tena tsüngda nung tsükchitep dendaktsür. Dawid-i Goliat tepsetdang Israel-tsüri Saul chubai meyirjang tepset...Saka Dawid-ibo meyirjang-ter tepset ta ken tenloktsüba agi...Saul chubai Dawid dak tenukmerem aser tepsetsü arishi.
11. Tekülem nung sentong anir-i menden külemdang...Akümtsübu a aliba Rev.Tajungsang Pastor ta karibo tenung tetshia ashir. Aeiner Pastor kar tanga arogo nungi aruba masü, asen arogo nung teinyakdak Pastor sura, pa/la tenung metetshi-aka...Akümtsübu a aliba Pastor ta asüba agi peritsü, kechiyong arogopur ajaki pa/la meteta dang lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Easter anogo nung Tenla kima Laishiba noklang aika rongdok



April 01, 2024: Easter anepdang US kübok Tennessee nung aliba Evangelical Arogo ka Tenla kima gari ka nung Laishiba noklang aika ber arua rongdok.

Arogo nung pastor-ibo, iba ya metetsümonga inyakba lir, ta aitsüogo.

Anepdang 6:00 ako meta police aser firefighters iba tesem jagi oa miji kanga kera ensep.

Global Vision Bible Church ya Nashville nungi mile 20 shi pilar Mount Juliet nung lir, aser iba Arogo Tenla kima anasa trailer gari ka nung Laishiba noklang aika rongdok, ta Wilson

County Sheriff's Office-i metetdaksü.

Sheriff office-i sangdong ka ajanga, "Laishiba bena aliba trailer ji metetsümonga lenmang tiyongtsü nung anenba sülen mi senoktsüba liasü," ta metetdaksü.

Global Vision tentetsang aser pastor, Greg Locke-i Facebook aser Instagram ajanga trailer aser Laishiba arongba noksatemji lemsatepa liasü.

Pastor-i ashiba agi, Arogo indang security cameras ajanga nisung kati Laishiba bena aliba trailer ji Tenla kima anasa anenba tangoka liasü.

Iba tatalokba sülen Easter tekülem sentong agiba mapang nung Pastor Locke-i Arogo züngsemtem dang aibelenerji aputsü aser temerenshi tulu agütsütsü, ta ashi.

Locke-i, Laishiba terongsa nungi Lai tapaktemji pai lema agütsütsü tebilemba liasü saka ketdangsertemi kuli atema ajakji bener oadok, ta metetdaksü.

Paisa, iba ya tesempa agi inyakba lir aser iba tatalokba ya FBI-i bushisüngdangdar, ta metetdaksü.

Tesüiba küm ishika tsünga Global Vision anema inyakba tatalokba kanga bulua akümer.

ANOGO ABEN TSÜNGREM DEN

Yimjung Chuba

"Kechiyong Pa, shibai Yihuda nunger aser Bendanger anaji ka kümdaktsü, aser tetsünga nung aliba jara raksatsü, Pa asen yimjung".

- Efesa 2: 14.

Khristai Yohan 14: 27 nung nütsüngtem dang nangzükba tesütep tenangzükba liasü, kechiaser parnoki tetendangba ajurua liasü: "Kü tesünep ni nenok nem agütsür". Pa asen yimjung kechiaser Pa ochi tamanger shia dak alir. Yimjungji Khrista den sendaktepa lir. Rom 5 nung tamang ajanga metendaktsüba sayur aser yimjung indang jembir. "Anungji tamang agi metendaktsü nung asenok Khrista ajanga Tsüngrem den yimjung kar". Asenok temerenshi taa agütsüba aser Tsüngrem ain adokba agientsü asoshi Khrista asü aser shia aru. Tsüngremi tang yimjung nung nüchi süa tamangertem den inyaker saka yimjungji Khrista nung aser Khrista ajanga dang angur. Tsüngrem tsütsü Pa asen yimjung.

Filipi 4: 6-7 nung asen shisabulu ajak Tsüngrem nem agütsütsü ashir aser Tsüngrem tesünep kobai tangatetba ajak atendanger aji agi ne mulung nüka alitsü.

Khrista dak mamangertem shirnoki amanger parnok nem yimjung agütsür, Khrista dak amangba agi Tsüngrem den yimjung bener arutsür. Shisabulu mapang nung, Khrista dena aliba metetba ajanga yimjung angur.

US nung Easter Sunday nü tamanger aikati tekülem kidangi aoer

April 01, 2024: United States nung küm shia Amongnü anogotem nung tamangertem kanga longsoa Tenla kidang aoba anogoji Easter Sunday lir, ta Lifeway Research-i metetdaksü.

Lifeway Research-i agiba survey nung shilem agir Protestant pastor tem shilem 90-i, Amongnü tekülem sentong nung nisung kanga longsoa Tenla kidangi aoba anogoji Easter Sunday asütsü, mesüra iba anogo ya tanabuba/ tasembuba jenjang nung asütsü, ta ashi.

Pastor tem shilem 52-i, Amongnü tekülem sentong nung

nisung telongsoba adenba Amongnüji Easter asütsü ta ashi, pastor tem shilem 30-i Easter anogo ya tanabuba jenjang nung asütsü ta ashi aser shilem 8-i Easter anogo ya tasembuba jenjang nung asütsü ta ashi.

Ano pastor tem shilem 81-i tekülem kidang nisung telongsoba adenba anogoji Khristmas asütsü, mesüra Khristmas anogo ya tanabuba/ tasembuba jenjang nung asütsü, ta ashi.

Pastor tem shilem 51-i, tekülem kidang nisung telongsoba adenba anogoji Mother's Day asütsü, mesüra

iba anogo ya tanabuba/ tasembuba jenjang nung asütsü, ta ashi.

Lifeway Research-i August 29 nungi September 20, 2023 tashi nung phone ajanga agiba survey nung Protestant pastor 1,004-i shilem agia liasü.

Tan ita tetenzüklen Gallup report ka ajanga, America nunger shilem 30-i parnoki hopta shia tekülem sentong ka nungbosa adener ta ashi, shilem 11-i ita shia tekülem sentong ka nungbo adener ta ashi, shilem 25-i tekülem kidangi khen-khen dang aoer ta ashi aser shilem 31-ibo tekülem kidangi kodanga maouer, ta bushiteta liasü.

Pope Francis-i September ita nung Indonesia semdangtsü



April 01, 2024: Taküm September ita nung Pope Francis-i Indonesia linük semdangtsü, ta Indonesia religious affairs minister-i metetdaksü.

Indonesia Tir menden nungi anisüngzüksü alisang, Joko Widodo-i Indonesia semdangtsü Pope Francis jaoka liasü.

Alima nung Muslim nunger nütsüng teimtiba aliba linükji Indonesia lir, aser iba linük nung tamangba yimsü balala amangertem tsünga yimjung ajungkettsütsü nükjidong nung 2022 küm June ita nung Tiri Pope dang linük semdangtsü mepishia liasü.

"Küm ana shi ataba sülen tatamsa Pope Francis-i Indonesia semdangtsü. Iba ya Catholic Khristantem atema sempet tajung ka asütsü," ta March 30 nü sentong ka nung Religious affairs minister, Yaqut

Cholil Qoumas-i metetdaksü. "Vatican-i Indonesia sorkar dangi yokba shidi ajanga Pope Francis-i September 3 nü Indonesia semdangtsü metetdakja lir. Iba ya Indonesia atema akhümket asütsü," ta Qoumas-i ashi.

Pew Research Centre ajanga ashiba agi, Indonesia nung Muslim nunger nütsüng million 242, aser Khristan nütsüng million 29 lir.

August ita nung Pope Francis-i Papua New Guinea semdangtsü aser kasa ita nungsa East Timor-a semdangtsü tebilemba lir.

2013 küm Cardinals-i Pope Francis shimba sülen pai bendang linük 44 semdangogo.

Taküm küm tatembanglen Pope-i Belgium semdangtsü aser par linük Argentina-a semdangtsü tebilemba pai lemsatepogo.

Easter mapang Pakistan nung Presbyterian Tenla ki ka arong

April 01, 2024: Easter tekülem sentong agitsü anogo ka-ana dang lia Pakistan nung aliba Presbyterian Arogo Tenla ki ka arongba agi

Khristantemi hotel ka nung ang tekülem sentong agi.

March 30 nü Islamabad nungi kilometer 57 shi pilar aliba Rawalpindi district nung United Presbyterian Church Tenla ki arong.

Police-ibo miji electric short circuit ajanga adok ta ashi ajisüaka Arogoibo nisung kar dak melung malemba lemsatepa liasü.

Easter Sunday atongtsü anogo ka-ana dang lia Tenla

ki arongba agi Arogo züngsem 200 dak temai hotel ka nung ang Easter tekülem sentong agi.

April 1 nü osangbenertem den jembidang pastor incharge, Adeem Alfonse-i, "Iba tatalokba bushisüngdangba agi onok melung asür. Sorkari ali tesadem lemkütsüra onoki yangji Tenla ki tasen süshitsü melunga lir," ta metetdaksü.

Ajisüaka March 30 nübo pastor-i, "Police-i takar shishilembar ka kümzüksü meranger," ta tai tonglokja liasü.

Shishilembar Muslim nunger Sheikh Ahmed meyong

tang tesüdak shopping plaza ka Tenla ki anasaji lir. Good Friday aser Easter jelia police-i Khristantem nem security agütsütsütsü atema süki yanglua tenokdangba ayubaji Ahmed-i ashishia liasü.

Tenla ki arongba sülen iba tesem nungji Khristan 500 shi adenshia Ahmed anema yimyim ayimba den külemi ketdangsertem nem takhangba agüja liasü.

Yaküm-a Pakistan nung Muslim nunger longkak aiteremi Tenla ki 23 rongdokja liasü. Tenla ki 23 nungjagi 22 bo Jaranwala jila nung rongdoktsüba liasü.

AO OSHI ANGAZÜKDAK:
TANÜ ANGAZÜKTSÜBA OJANG



Süki

(v) o mashileni jembi (sarcastic expression)

* Lai jashiba agi kü den o süki agi jembi.

Sükitep

(adj) obang mapui mashilen jembitep (talk sarcastically to each other)

* Asangba o Amongla na o sükiteper senshi.

OLONG PAITEP # 6744

1		2			3		4		5
				6		7			
8									
					9				
			10						
11									12
					13		14		
15									
16							17		

TIPLÉN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashirtem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 6743 TELANGZÜBA

TIPLÉN :


- Tesangra, 5. Mungo,
- Kisen, 8. Salem, 12. Semki,
- Kilem, 15. Kensü,
- Sangpang.

LANGTSÜNGLEN :

- Temesen, 2. Raksa,
- Aon, 4. Aso, 6. Nile,
- Alizüing, 10. Omen,
- Lemta, 13. Ola, 14. Kin.

NAI-A YA METETTER MA

Alima nung "Illuminated steel sculpture" tulutiba



March 31, 2024 nü Ahmadi Governorate, Kuwait nung aliba Al-Kout Mall nung crescent indang steel sculpture ka angur. Deobarnü Kuwait-i Guinness World Record tasen ka yanglu aser ibaji "World's largest illuminated steel sculpture" atema lir. Iba steel crescent tasazük ya 15 meters lir.

Mizoram nung World War II veteran Subedar Thanseia asü



Aizwal, April 1, 2024 (Agencies): Mizoram nung World War II veteran Subedar Thanseia alima nungi pialogo. Pa arishi küm 102 liasü.

Subedar Thanseia ya Indian Army Assam Regiment nung veteran ka liasü aser mapang tatsüka shirangba sülen Deobarnü (March 31) asü.

Subedar Thanseia taküm

nung tasütait mapa aika inyakogo aser talisa World War II mapang Battle of Kohima nung pai tongtipang shilem agia liasü.

Jessami nung parnok mapa lemzüka inyakdang 1st Assam Regiment tentet aser iba nung pai tongti shilem agi.

Subedar Thanseia-i Kohima nung tasütait mapa inyakba

ajanga Allied forces-i takok angu.

Pai mapa nungi sodi agiba sülen-a nübertem ajungmesoba mapa inyak aser veteran maparen den shisaliok tsütsü shilem tulu agi.

Pa den asüpila sentep sentong nung nisung aika adenshi aser talisa Assam Regiment nungia sepaitem aden.

Ichamati nung non-tribals 2 tepseter jangjaogo: Meghalaya CM

Shillong, April 1, 2024 (Agencies): East Khasi Hills district kübok Ichamati nung non-tribals ana tepsetertem maitsü jangjaogo ta Meghalaya chief minister Conrad Sangma-i ashi.

"Onoki aibelenertem aputsü atema kanga merangdar. Sorkari ozüing den apet mapa

inyaktsü aser temeten agütsütsü" ta CM Conrad-i ashi. Tang tashi nung iba dak sendakba nung nisung apuba kecha mali ta East Khasi Hills district police-i ashi.

Ichamati aser Dalda nung Esan Sing aser Sujit Dutta na tasü mang angu. Tenaprong ya non-tribals liasü aser India-

Bangladesh arrtsü anasa Shella assembly constituency nungi liasü.

Khasi Students' Union (KSU) aser tanga NGOs-i Ichamati nung Citizenship Amendment Act (CAA) anema sentong ka agiba sülen iba lendong ya atalok ta police-i ashi.

**GOVERNMENT OF NAGALAND
DIRECTORATE OF TOURISM**

NAGALAND: KOHIMA
nagalandtourism2014@gmail.com

A D M I S S I O N N O T I C E

Kohima, Dated th April 2024

NO.TOUR (T & S)-3/2011-12/ // Interested Applications are invited for eligible Candidates invited for admission at Institute of Hotel Management, Shillong and Guwahati for the following courses for academic session 2024-2025.

Sl.no	Course	Institute	Eligibility	last date of submission on or before
1	B.SC in Hospitality and Hotel Administrative (3 years degree course)	IHM Shillong & Guwahati	10+ 2 or equivalent examination from CBSE, ISE & other state board examination	On or before 31 st July 2024

Interested Candidate may submit their applications supported by all the necessary documents to the office of the undersigned on or before 31st July 2024. Selection of Candidates will be done on the basis of the academic marks.

Sd/-
(VEYIELO DOULO)
Director Tourism.

PUBLIC NOTICE

ICICI Bank | Branch Office: ICICI Bank Ltd, Landmark Building, 4th Floor, 228A, AJC Bose Road, Kolkata- 700020. CIN No: L65190GJ1994PLC021012, www.icicibank.com

Tsüinglanglen shia aliba sen apuri Bank nungi sen apuba sentong aser tetemlok memenoktet aser iba loan ya Non-Performing Assets (NPA) kumogo. Securitisation and Re-construction of Financial Assets and Enforcement of Security Interest Act-2002 indang Section 13 (2) kübok parnok indang addresses dangi osang yokogo, saka parnok nungi telangzüba kecha malinung yimjak nung iba osang ya metetdaksür.

Sr. No.	Name of the Borrower/ Co-Borrower/ Guarantor (Loan Account Number) & Address	Property Address of Secured Asset/ Asset to be Enforced	Date of Notice Sent/ Outstanding as on Date of Notice	NPA Date
1.	Turaka Balakrishna/ Turaka Sriramulu/ Turaka Maha Laxmi/ G 5028855 C/o 99 APO RFN GD, 25 Assam Rifles, District Dimapur, Nagaland Dimapur - 797112/ LBZDU00006035011	Plot No 31 , Survey No 60/12 D, Palasa Mandal, Kasibugga Elakha, Bantukothuru Panchayati, Kesavapuram Gramam, Srikakulam Zilla, Andhra Pradesh (Admeasuring an area of 193.6 Sq Yards or 162.62 Sq Mt. open Land.	February 23, 2024/ Rs. 17,05,995/-	01/11/ 2023

Substituted service of notice atema mera agiogo. Tekalen shia aliba sen apur aser/mesüra parnok kulisür (guratons) dang iba sangdong adoker anogo 60 tsüngta sen tanüingba ajak menoktsü metetdaksür, aji mesüra Securitisation and Re-construction of Financial Assets and Enforcement of Security Interest Act, 2002 indang ozüing nung shia aliba ama mera agitsü.

Date : April 02, 2024
Place : Dimapur

Authorized Officer
ICICI Bank Limited

Kenokanung court-i Imran Khan nem khen atema taitok agütsüogo



Islamabad, Rongchii/April 1 (Agencies): Pakistan nung okadak kati, ozüing alema state sempet ayokba ken o dak sendakba nung taoba Ato Kilonser Imran Khan tepuokdak ayutsü obendang agütsür aliba suspend süja atar.

Iba ken o nung Khan aser pa kinungtsü Bushra Bibi na küm 14 (tenaprongla) tepuokdak ayutsü atema January 31 nü obendang agüja liasü.

Islamabad High Court-i Hombarnü sangdong ka ajanga, Eid soti tembangba sülen telemtetba ka magi tashi Khan aser kinungtsü na nem obendang agütsür aliba suspend süa atatsü, ta metetdaksüogo.

Arishi küm 71 tain Khan-i sen million 140 alang state sempet ayokba indang memetetdaksüba atema pa aija lir. Item sempettem ya pa 2018 küm nungi 2022 küm April ita

tashi Ato Kilonser mapa inyakba mapang agizükbatem lir.

Iba ken o ya Pakistan indang anti-corruption agency-i benok, shirnoki Khan aser pa kinungtsü nati ozüing alema sempettem aliba aser ayokba atema aitsüogo.

Iba obendang agütsüba ajanga tena küm ter tashi election nung metokteptetsüsa aküm aser senchi sen million 787 (tenaprongla) achi.

Pakistan nung opposition party tongtiba Pakistan Tehreek-e-Insaf (PTI) party ngutetsang Khan ya ken o balala nung aija taoba küm August ita nungi tepuokdak lir.

State indang meim osang metetdaksüba atema Khan küm ter tepuokdak ayutsü obendang agütsüba sülen anogo ka lir pa ano sempet ayokba aser alizükba ken o nung aija liasü.

February 3 nü okadak kati

Khan aser kinungtsü na 2018 küm kibong akümba ya Islamic temzüng ozüing alema inyaksangshiba ka lir ta shia Khan kinungtsüa tepuokdak küm tenet ayutsü obendang agüja liasü.

PTI lenir Sayed Zulfikar Bukhari-i Al Jazeera dang ashiba agi, state sempet ayokba aser alizükba dak sendakba nung ken o okadak kanga junga tejakdangi bener aoba ajanga telemtetba tajung ka agitsü pai imla liasü ta ashi.

"Khan aser pa kinungtsü anema iba ken o ya tatemdaksü mali aser iba ken o ya agintsü imla liasü," ta pai Al Jazera dang ashi.

"Iba telemtetba agiba ya onoki pelashishia agizüker aser Khan aser pa kinungtsü anema benoka aliba tanga ken o tema kasaji agintsü imla atar," ta paisa shisem.

METETDAKTSÜR

Dimapur Area Aor Ordained Ministertem nungdak kar lemsateptsü atema April 5, 2024 mapang 9:00 AM Dimapur Ao Baptist Arogo tenla ki tuluba nung adenshtsü mepishia metetdaksür.

Asenok ajak anema lia iba mensem nung arua shilem agitsü sarasadema atadi.

Rev. C. Walu Walling
Tezulur, DAAOMF

Russia-i hon aturtem bushiba sentong thitsüogo

Moscow, Rongchii/April 1 (Agencies): Russia nung nisung 13 sabangba sülen parnok kümzüksü atema inyaka aliba maparen joko ojang dang inyaksü Russian emergency services-i telemtetba agiogo.

China den arrtsü anasa Amur tesem nung hopta ana dak tema tejakdang hon atuba tesem ka nung anentsüh alua hon aturtem ali telung nung meter 120 shi lur lia anembangba sülen Pioneer gold mine achaayangertemi iba telemtetba agiba ya Hombarnü sangdonga liasü.

Pokrovsky Mine achaayangertemi ashiba agi, bushisüngdangba sülen hon aturtem jenoka alitsü ta bilemba tesem ya tzü agi metsünger aliba ngutetogo, aser hon atur 13 prongla sür alitsü ta bilemer.

Parnokisa, tekümzükba maparen inyaksü asoshi kanga dang lendong kümogo, ta ashi.

"Pioneer mine nung tekümzükba maparen ojang dang inyaksü April 1 nü telemtetba agiogo," ta parnoki metetdaksü.

"Ali tua aiba sülen hon

aturtem jenoka alitsü ta bilemba tesem ya long aser tzü agi metsünger aliba ngutetogo. Iba inyakyim nung sendaka aliba tekümzükertem aser hon aturtem taküm lendong bang nung lir, kechiyong ali tua ia aliba ya tanaben chireptsü akok," ta kasa sangdong ajanga metetdaksü.

Kremlin otongdar Dmitry Peskov-i, tekümzükba maparen ojang dang inyaksü telemtetba agiba ya osang tajung masü, ta ashi.

"Tekümzükba maparen takokba tashi inyakdangogo, ajsüaka tensa agi ya dang," ta pai osangbenertem dang ashi.

Iba tesem governor-i ashiba agi, tekümzükertemi parnok taküm lendongbang nung toktsür item hon aturtem kümzüksü atema takokba tashi inyakdangogo aser hon atur kinungertem nem senotsü teyari agütsütsü.

Iba hon atuba tesem ya alima nung hon atuba tesem tulutiba rongnung ka lir aser Russia nung iba ajanga sen timtiba aazüker. Iba hon atuba tesem ya Russian copper and gold producer Ural Mining And Metallurgical Company (UMMC) meyong lir.

Israel sepaitemi al-Shifa mozüki nung hopta ana amakba sülen ainshioogo

Gaza City, Rongchii/April 01 (Agencies): Israel mitkari hopta ana tashi Gaza City nung aliba al-Shifa mozüki amakba sülen mitkartem ainshioogo ta ashi.

Israel Defense Forces (IDF) ajanga ashiba agi, sepaitemi mozüki nung kiralongrar aika tepsetogo aser noklang dak tema tepsetogo aser hadir den itdangiterba osettsüset aika ngutet.

Gaza nung Hamas meyong health ministry ajanga ashiba agi, Israel sepaitemi nisung tasü mang aika yutsür ao. Anasa aliba tesemtema aoyi kuma rasatsüogo ta ashir.

Iba al-Shifa mozüki nung Hamas telok adenshiba ajanga amak ta IDF-i ashi.

Hopta ana dak tali amakdang Israel-i tayimtsü amshia anasa aliba ki aser tesemtem nunga amak aser kanga sashia khatapa liasü. Hamas aser Palestinian Islamic Jihad operatives temi mozüki indang ward tem amshiba mechi itemjia amak ta IDF-i ashir.

Israel sepaitem ainshiba sülen noksa tangokba nunga intensive care unit aliba al-

Shifa indang main surgery building, anasa emergency, general surgery aser orthopaedics departments aliba ki raksatsür liasü.

Sepaitemi al-Shifa mozüki nung mezüing-mezüing operation agi aser ainshioogo, ta IDF sangdong ajanga ashi. Iba mapang IDF ajanga civilian, shiranger aser medical team tem meyrutsütsüsa inyak, ta ashi.

IDF ajanga complex nung department ajunga, ki aser ki o jen ajak raksatsüogo, ta Gaza indang Hamas meyong civil defence service odongtar Mahmoud Basal-i ashi.

"Linük asoshi takum bendanga agüja asürtem züngdangtsü kanga tasak lir, kechiaser Israel sepaitemi lenmangtem bulldozer amshia mükepsatsü aser al-Shifa complex telung aser temeket nung nisung tasü mang rema lir," ta pai ashi.

Al-Shifa ya kiralongrar aliba tesem ka kumogo aser IDF-i amakdang lenirtem densema Palestinian armed groups züngsem 200 dak tema tepsetogo aser aika bendanga agüja temai adokogo, ta Israel

Ato Kilonser Benjamin Netanyahu-i Deobar nikonddang shia liasü.

Ajsüaka World Health Organization (WHO) tekolakba Dr Tedros Adhanom Ghebreyesus-ibo al-Shifa mozüki amak tenzüker yangi shiranger 21 süogo ta ashir.

Shirangertem aiben tesem balalai belenshia liasü aser shiranger 100 dak tema medical teyari maliba ki nung ayu, ta pai ashi.

Hopta ana tejakdang Israel sepai noklang ishikati ghonda ishika tsüngta Gaza Strip nung mozüki tulutiba telungi ai. November ita mangatettep adoka iba mozüki sapangdang tank, gari den tayimtsü teyari agia hopta aika nungang sapangtet.

Israel mitkar yarirtem asoshibo ibai takok tuluka alitsü, saka al-Shifa mozüki tanaben amakba ya Israel mitkari rara asoshi tasa yangluba nung aibelen lir ta kari ashir.

Tang rara nung Gaza indang mozüki nung tali temulung agütsür, kong Israel-i tesem balala nung pokloktsüba ajanga Palestine

nunger nisung meyririjang aika yangji jenoker. Ajsüaka Israel sepaitemi yangji Hamas züngsemtem dena lir ta shia mozüki tema amaker.

Hamas teloki operation agitsü atema civilian health infrastructure amshir ta Israel-i mapang talangka nungi tai tonglokja arur, saka Palestinian teloki magizüker.

Netanyahu-i iba o ya Deobar aonung ashi aser iba sülen pa hernia atema surgery agia liasü.

Hombarnep pa indang office-i Netanyahu operation takok ngua agiogo aser pa temang junga lir ta shia liasü.

Pa operation agiba mapang Israel nunger nisung meyririjang aika Jerusalem nung adenshia sorkar anema longkak aita liasü.

Tang tashi Gaza nung Israel nunger pua aliba mekumzükertem atema longkak aiter temi aitsü aser election agitsü akhangar.

Pua alirtem kidangi anur arutsü asoshi tanen makai inyaker aser longkak aiter temi akhangba ama inyakra Hamas dang ajangzüksü ta Netanyahu-i ashi.

Hamas fighter temi October 7 nü Israel south tsütsüi aika nisung 1,200 shi tepseter ano nisung 253 pua bener aoba ajanga rara ya tenzüker. Tang tashi Hamas ket nung pua bener aor nisung 130 shi lir aser item rongnung nisung 34 süogo ta züngshir.

Ano Deobarnü central Gaza nung Deir al-Balah kübok al-Aqsa mozüki nung Palestinian Islamic Jihad züngsem dak tenük yoker Israel sepaitemi tayimtsü amshia amakba mapang osangbener tenet yirua liasü.

Mozüki ali telunglen PIJ temi command centre ama amshiba tesem ka amak ta IDF ajanga ashir.

Iba mapang PIJ züngsem pezü tepset, shirnok Hamas den sendaktepa lir aser October 7 lendong nunga shilem agia liasü ta ashi.

Israel-i October 7 nungi tenzüka Gaza nung raradang nisung 32,845 takum samaogo, ta Hamas meyong health ministry ajanga ashir. Kasa mapang nisung 75,392 yiru.

Tesüba ghonda 24 tsüngta nisung 63 tepsetogo aser 94 yirutsüogo, ta parnoki ashir.

Jannik Sinner-i Grigor Dimitrov koka Miami Open benogo



Rongchii/April 1, 2024
(Agencies): Italy nung asayar Jannik Sinner-i Deobarnü ATP Miami Open Masters 1000 tebur kija asaya final nung Bulgaria nung asayar Grigor Dimitrov 6-3, 6-1 agi ayong ayonga kokogo.

Sinner-i taküm tang agi asayamung asemububa kokogo aser iba tetezü pai ATP world rankings nung Spain nung asayar Carlos Alcaraz ajateta tanabuba jenjang tongtetogo.

Sinner-i taküm kanga junga asaya arudar aser pai taoba asaya 26 nungi 25 bo kokogo. Pa Indian Wells nung dang semifinal nung Alcaraz-i koka liasü.

Taküm pai Australian Open

asay Rotterdam Indoors akokba sülen tang Miami Open kokogo. Final asaya mezüngbuba set nung Sinner-i Dimitrov indang serve break asü aser asaya tepeyong nung break point ka dang ajangshia liasü. Iba sülen pa serve tanabuba break süa mezüngbuba set ayong ayonga akok.

Tanabuba set nunga Italy nung asayar yagi Dimitrov indang serve ka break süa pa 3-1 agi tejakdang aküm aser iba sülen Dimitrov nem asaya ka danga mekokdaksüi pai asaya 6-1 agi ayong ayonga koka liasü.

Sinner-i Miami nung final tasembuba nungang takok ngutetogo. 2021 küm pa final

nung Poland nung asayar Hubert Hurkacz-i akok aser taoba küm pa final nung Russia nung asayar Daniil Medvedev-i koka liasü.

Sinner-i 2023 küm Toronto nung mezüngbuba Masters 1000 title aben aser tang tanabuba Masters 1000 title benogo.

Kasa mapang nung Dimitrov-a 2018 küm October ita sülen tang mezüngbuba ATP rankings nung top 10-i iogo.

Arishi küm 32 tain asayar yagi taküm Miami Open nung quarter final nung world number two asayar Alcaraz tsükdaksü aser semi-final nung world number five asayar Alexander Zverev koka liasü.

HI-i tetsür camp atema Assessment Squad sangdongogo

Rongchii/April 1, 2024
(Agencies): Hockey India-i assessment squad nung asayar 60 shimogo kong goalkeeper Savita Punia aser forward Vandana Katariya na amala asayar tejen aser asayar tasentem aika densema lir. Iba camp ya Hombarnü tenzükogo aser anogo tenetnü agiba sülen national camp atema asayar 33 shimtsü.

Assessment camp ya Sports Authority of India centre nung agitsü aser taruba coaching camp aser international exposure tours atema asayar 33 shimtsü asoshi April 6 aser 7 nü selection trials agitsü.

Paris Olympics atema qualify mesütetba sülen Hockey India-i national camp ajungketshitsü atema tenangzükba agütsüogo.

Asayartem tetsür hockey team coach Ankitha BS dangi aotsü, shiba Dutch-tsür Janneke Schopman-i mapa toktsüba sülen shima liasü. Mapa inyakra

tesem nung akümstübu agi anünger aser timyaksü majung ta shia Schopman-i coach mapa tokja liasü.

HI-i ashiba agi, chief coach ka meshim tashi Ankitha-i iba mapa ya bena atatsü.

Assessment squad nung goalkeepers Savita, Sonal Minj, Bichu Devi Kharibam, Madhuri Kindo, Bansari Solanki, Promila Kr, aser Ramya Kurmapu nung densema lir.

Savita aser Bichu na dak alia tanungba asayartem ajak ya tasen dang lir aser Uttar Pradesh nungi arishi küm 22 tain Bansari Solanki-i ajaki tenük yokba sempet aketba asayar ka lir.

Assessment camp atema shimba asayartem:

Goalkeepers: Savita, Sonal Minj, Bichu Devi Kharibam, Madhuri Kindo, Bansari Solanki, Promila Kr, Ramya Kurmapu

Defenders: Udit, Nikki Pradhan, Ropni Kumari,

Lalhlunmawii, Preeti, T Suman Devi, Anjana Dungdung, Nishi Yadav.

Midfielders: Monika, Sonika, Neha, Mahima Choudhary, Nisha, Jyoti, Salima Tete, Manashri Shedage, Akshata Abaso Dhekale, Lalruatfeli, Marina Lalramnghaki, Prabhleen Kaur, Manisha Chauhan, Ishika Chaudhary, Ritanyna Sahu, Jyoti Chhatri, Ajmina Kujur, Sujata Kujur, Kruthika Sp, Mahima Tete, Mamta Bhat, Edula Jyothi, Anisha Dungdung, Bhavna Khade, Maxima Toppo

Forwards: Deepika, Sharmila Devi, Navneet Kaur, Deepika Soreng, Sangita Kumari, Vaishnavi Vitthal Phalke, Rutaja Dadaso Pisal, Lalrindiki, Lalremsiami, Vertika Rawat, Preeti Dubey, Hritika Singh, Mariana Kujur, Mumtaz Khan, Taranpreet Kaur, Baljeet Kaur, Vandana Katariya, Dipi Monika Toppo, Kajal S Atpadkar, Manju Chorsiya.

India-i küm 48 tashi bener aliba record ka Sri Lanka-i ajatetogo

Rongchii/April 1, 2024
(Agencies): Tang Bangladesh den Chattogram nung asaya aliba tanabuba Test asaya nung Sri Lanka tebur cricket team-i Deobarnü otsü tasen ka yangluogo.

Zahur Ahmed Chowdhury Stadium nung iba Test asaya mezüngbuba innings nung run 531 yangluba sülen India team-i küm 48 tashi bena aliba record ka Sri Lanka team-i ajatetogo.

SL team-i mezüngbuba innings nung run 531 yangluba ya team kati Test asaya ka nung asayar kati danga century meyanglui run timtiba yangluba lir. Dhananjaya de Silva-i aniba team nung asayartem rongnungi Nishan Madushka (57), Dimuth Karunaratne (86), Kusal Mendis (93), Dinesh Chandimal (59), Dhananjaya de Silva (70), aser Kamindu Mendis (92) nungeri half century yanglu, ajisüaka parnok rongnung kati danga century meyanglutet.

Test innings ka nung asayar kati danga century meyanglui run timtiba yangluba ya India team-i yanglur liasü. 1976 küm Kanpur nung New Zealand den

asayaba mapang Bishan Singh Bedi lenisüba nung India team-i asayar 9 out sür run 524 yanglur liasü.

Iba asaya nung Sunil Gavaskar (66), Mohinder Amarnath (70), Gundappa Viswanath (68),

Ashok Mankad (50), Syed Kirmani (64), aser Bishan Singh Bedi (50) nungeri ajaki India team atema half-century yanglua liasü.

Taoba hopta Sylhet nung mezüngbuba Test asaya nung Sri Lanka-i run 238 agi Bangladesh kokogo aser tanabuba Test asaya nunga SL team-i tanabuba anogo tatem tashi nung Bangladesh nungeri batter ajak out sütsüogo. Bangladesh team-i mezüngbuba innings nung Sri Lanka team-i yangluba run 476 agi memenepli lir.

Iba asaya nung Bangladesh team atema all-rounder Shakib Al Hasan-i over 37 nung run 110 agütsür wicket asem agia liasü aser Hasan Mahmud-ia wicket ana agi. Maneni Pacer Hasan Mahmud aser spinner Mehidy Hasan Miraz natia wicket kaka agia liasü.

National Esports Championships April 18 nü tenzüksü

Rongchii/April 1, 2024
(Agencies): National Esports Championships (NESC) April 18 nü tenzüksü, ta Esports Federation of India (ESFI)-i Hombarnü sangdong ka ajanga metetdaksüogo.

NESC ajanga India nung asayartem atema DOTA 2 (Open), eFootball (Open), aser Counter-Strike 2 open aser tetsür category nung parnok sempet sayatsü asoshi sabang ka agütsütsü.

Online qualifiers April 18 nü nungi tenzüksü, koba double-elimination format nung asayatsü renema lir.

Qualifiers asayaba sülen takokertem regional qualifiers-i atutsü, kong parnok 16buba World Esports Championships (WEC) global finals nung tokteptsü atema jenjang ka asoshi Asia linük nungi asayartem den tokteptsü.

16buba World Esports Championships (WEC) ya November 11 nungi tenzükä Riyadh, Saudi Arabia nung asayatsü.

International Esports

(IESF)-i ayongzükba WEC 2024 nung Counter Strike 2 (Open and Female), Dota2, eFootball series, Mobile Legends: Bang Bang (Open and Female), aser PUBG MOBILE ta asaya pongu nung linük balala nungi team 609-i shilem agitsü.

Iba asayamung nung senpet ajak senteper USD million 1 asaya ajak nung temaba jenjang nung tembangba team ti nem lema agütsütsü.

"India team Asian Games 2022 nung mezüng asayaba sülen 2023 küm otsüsütsüsa kanga junga asayaogo aser NESC 2024 nung shilem agitsü yongya atar," ta EFSI Tir Vinod Tiwari-i ashi.

"Taoba küm onoki ayongzükba linük nung mezüngbuba CS:GO qualifiers asayaogo, aser iba asayamung nung takok anguba team Asian qualifiers tonga asayaogo. Takümbo linük nungi tetsür asayartemi tajungba asayateta temaba jenjang tongtettsü imlar," ta paisa shisem.

BILEMDANGANG

"Nai jangraba mapa inyakra temulungsüa dang alitsü."